



## Suns Europe, il plui impuartant festival european des arts in lenghe minoritarie al torne a Udin

*La cuinte edizion si davuelzarà in citât dai 28 e ai 30 di Novembar.*

**Suns Europe** al è daûr a tornâ: il **festival des arts in lenghis minoritariis de Europe**, lûc di confront e incuintri des miôr produziions artistichis in lenghe minoritarie su scjale europeane, si davuelzarà ancje chest an a Udin ae fin di Novembar. Propit pe sò dimension internazionâl e contemporanie, e pe sò maniere di promovi e meti in rêt a nivel internazionâl lis lenghis mancual pandudis, **Suns Europe al jentre tra i progjets di ponte finanziâts de ARLeF - Agenzie Regjonâl pe Lenghe Furlane.**



Il program al è cetant siôr di events artistics, culturâi e di aprofondiment. **Dai 28 ai 30 di Novembar** a Udin al sarà un corisi daûr di apontaments che a àn l'obietif dopli di promovi produziions artistichis ricerjadis e originâls, ma ancje di mostrâ cemût che la diversitàt linguistiche in Europe, in plui di jessi une ricjece culturâl e un dirit di fonde, e je une risorse creative inestimabile. Par resonâ su chescj dirits, sui vantaçs e lis oportunitâts dal plurilinguism, te buinore di sabide ai 30, **in graciis de ARLeF, si davuelzarà ancje chest an Scuele Europe**, la lezion-conciert pai students de scuelis secundariis di secont grât dal teritori furlan. Une ocasion uniche, che ogni an e cjape dentri uns 500 students, par fevelâ de educazion plurilengâl e de citadinance multicultural, acompagnade de musiche dal vîf dai artiscj finaliscj di **Suns Europe**.

Incuintris su la leterature in lenghe furlane, antepremis cinematografichis al Cinema Centrale, *reading* di poesiis scritis fintremai sui vistîts, fin al grant finâl che al sarà sabide ai **30 di Novembar dal 2019 des 21 indenant tal Teatri Gnûf "Giovanni da Udine"**: il **concierton** che al maravearà il public intune sere fate di musiche e di divertiment, di culturis e di artiscj, a dimostrazion de bielece dal plurilinguism e de modernitàt des lenghis minoritariis europeanis. In ceste cuinte edizion il festival si colore di musiche rock, punk, hard rock e psichedeliche, di ritmis pop&soul, krautrock, cumbia, dub e rap, ma ancje di une cumbinazion dal dut gnove di jazz e musiche classiche. I artiscj e i grups sul palc a vegnin de Sardegne, dal País Basc, dal Gales, dal Cjanton dai Grisons, des isulis Faer Oer, de Galizie, de Ocitanie francese, dai País Catalans, de Basse Sassonie e, clâr, dal Friûl.

**Suns Europe** si conferme il principâl Festival european tal contâ e tal fâ cognossi lis lenghis mancual pandudis: par chest, dongje de poie de **ARLeF**, de **Regjon Autonome F-VJ** e de **Fondazione Friuli**, al gjolt dal jutori e dal patrocini dal **Consei de Europe** e di tancj sogjets publics e privâts, furlans e internazionâi.

I **biliets** pal concert a son za in vendite. Par ducj i details, il program, e lis informaziions sul festival, al baste lâ su la sò pagine **Facebook: @SunsEuropeFestival**